

Adroddiad i'r:	Pwyllgor Cynllunio
Dyddiad y Cyfarfod:	14 Mehefin 2017
Aelod/Swyddog Arweiniol:	I'w gadarnhau
Awdur yr Adroddiad:	Karsten Brußk [Swyddog Cynllunio]
Teitl:	Cadarnhad - Gorchymyn Cadw Coed Cyngor Sir Ddinbych Rhif 01/2017 yn ymwneud â Thir gerllaw Glasfryn, Gellifor yn Sir Ddinbych

1. Am beth mae'r adroddiad yn sôn?

- 1.1 Mae'r adroddiad hwn yn sôn am Orchymyn Cadw Coed Cyngor Sir Ddinbych Rhif 01/2017 sy'n ymwneud â thir gerllaw Glasfryn yng Ngellifor (Atodiad I).

2. Beth yw'r rheswm dros lunio'r adroddiad hwn?

- 2.1 Defnyddiodd y Cyngor bwerau a amlinellir yn Neddf Cynllunio Gwlad a Thref 1990, adran 201 (Gorchymynion Cadw Coed dros dro) ar 24 Mawrth 2017. Mae angen penderfyniad ar fwriad y Cyngor i gadarnhau'r Gorchymyn Cadw Coed (GCC) uchod cyn iddo ddod i ben ym mis Medi 2017.

3. Beth yw'r Argymhellion?

- 3.1 Mae'r Aelodau'n cadarnhau Gorchymyn Cadw Coed Cyngor Sir Ddinbych Rhif 01/2017 sy'n ymwneud â Thir gerllaw Glasfryn, Gellifor yn Sir Ddinbych (ynghlwm fel Atodiad I).

4. Manylion yr adroddiad

- 4.1 Nod gyffredinol Gorchymynion Cadw Coed (GCC) yw diogelu coed unigol neu grŵp o goed sy'n cyfrannu at nodweddion y dirwedd, yn darparu amwynder er mwynhad i'r cyhoedd, yn darparu cynefin i fywyd gwylt lleol, neu oherwydd eu prydfwerthwch cynhenid. Mewn termau cyfreithiol, maent yn ei gwneud yn drosedd torri, difrigo,ocio, diwreiddio, difrodi neu ddifetha coeden yn fwriadol heb ganiatâd yr awdurdod cynllunio lleol.
- 4.2 Nid oes gan y GCC unrhyw rym os nad yw wedi'i gadarnhau gan yr awdurdod cynllunio lleol. Mae Deddf Cynllunio Gwlad a Thref 1990, adran 201, yn caniatáu gwneud Gorchymynion Cadw Coed dros dro os yw'r coed dan sylw mewn perygl mawr o fod yn destun gwaith difrodol neu dan fygythiad o gael eu torri cyn bo hir. Fodd bynnag, mae adran 201 yn amodi mai dim ond am gyfnod o chwe mis y bydd y GCC dros dro hwn mewn grym, gyda'r cyfnod hwnnw'n cychwyn ar y dyddiad y gwnaed y gorchymyn neu y cadarnhawyd y GCC gan yr awdurdod cynllunio lleol.

- 4.3 Defnyddiodd y Cyngor y pwerau a amlinellir yn Neddf Cynllunio Gwlad a Thref 1990, adran 201, ar 24 Mawrth 2017. Golyga hyn y bydd y GCC dros dro sy'n ymwneud â GCC Cyngor Sir Ddinbych (CSDd) rhif 01/2017 yn colli ei rym ar 24 Medi 2017. Os na fydd yr Aelodau'n cadarnhau unrhyw GCC cyn i'r cyfnod o chwe mis ddod i ben, ni fydd y goeden yn elwa ar unrhyw amddiffyniad ychwanegol oni fydd yr awdurdod cynllunio lleol yn gwneud Gorchymyn Cadw Coed newydd.
- 4.4 Mae hysbysu a chyhoeddi yn gam sylfaenol yn y weithdrefn o wneud GCC. Yn ôl deddfwriaeth, roedd rhaid i'r Cyngor adael i aelodau'r cyhoedd, gan gynnwys tirfeddianwyr a thrigolion lleol a effeithiwyd, gyflwyno sylwadau a gwrthwynebiadau am gyfnod o 28 diwrnod. Daeth y cyfnod hwn i ben ar 4 Mai 2017.
- 4.5 Derbyniodd y Cyngor gyfanswm o 2 o sylwadau, ill dau o blaid y GCC:
- Sylw 1 (cyflwynwyd dros e-bost): 'Byddwn yn ddiolchgar pe gallech chi gofnodi fy nghefnogaeth i GCC parhaol ar y goeden dderw ger Glasfryn yng Ngellifor.' a
 - Sylw 2 (cyflwynwyd drwy lythyr): 'Mae popeth wedi cael ei ddweud, felly gwnewch eich gorau i achub yr hen goeden dderw hyfryd hon sydd wedi bod yn rhan o'r dirwedd ers canrifoedd.'
- Gellir gweld y ddau gopi drwy gysylltu â Cynllunio Strategol a Thai yn Ninbych dros y ffôn [01824 706916] neu dros e-bost [ldp@denbighshire.gov.uk].
- 4.6 Cafodd y Cyngor ohebiaeth gychwynnol gan barti â chysylltiad â'r tir, yn cydnabod derbyn y llythyr ac yn ystyried camau pellach. Ond ni chafwyd sylwadau pellach gan y parti hwnnw er iddynt gael rhagor o amser i ymateb.
- 4.7 Gall y Cyngor gadarnhau'r GCC naill ai heb ei addasu neu'n amodol ar unrhyw addasiadau y mae'n eu hystyried yn fanteisiol.

5. Sut mae'r penderfyniad yn cyfrannu at y Blaenoriaethau Corfforaethol?

- 5.1 Er nad yw'r penderfyniad yn cyfrannu'n uniongyrchol at unrhyw rai o Flaenoriaethau Corfforaethol y Cyngor, gellir ei gysylltu â 'sicrhau mynediad i dai o ansawdd dda' gan ei fod yn darparu amwynder a gwerth adloniannol i drigolion Gellifor.

6. Faint fydd yn ei gostio a sut fydd yn effeithio ar wasanaethau eraill?

- 6.1 Nid fydd unrhyw gost ynghlwm â chadarnhau'r Gorchymyn Cadw Coed (GCC). Os caiff ei gadarnhau, bydd y GCC yn amod cynllunio perthnasol a bydd rhaid ceisio caniatâd gan Reolwyr Cynllunio / Datblygu cyn gwneud unrhyw waith.

7. Beth yw prif gasgliadau'r Asesiad o Effaith ar Les?

- 7.1 Mae Deddf Llesiant Cenedlaethau'r Dyfodol (Cymru) 2015 yn gosod dyletswydd ar y Cyngor i gynnal datblygiadau cynaliadwy a hefyd i gymryd camau rhesymol wrth gyflawni ei swyddogaethau i fodloni ei amcanion datblygu cynaliadwy (neu les). Mae'r Ddeddf yn ei gwneud yn orfodol dangos sut mae'r datblygiad yn cydymffurfio â'r Ddeddf mewn perthynas â phob cais y penderfynir arno.
- 7.2 Drafftwyd yr adroddiad gan roi ystyriaeth i ddyletswydd y Cyngor a'r "egwyddor datblygu cynaliadwy" a nodir yn Neddf 2015. Mae'r argymhelliad yn ystyried yr angen

i sicrhau bod anghenion y presennol yn cael eu diwallu heb gyfaddawdu ar allu cenedlaethau'r dyfodol i ddiwallu eu hanghenion eu hunain. Ystyrir felly na fyddai'r argymhelliad arfaethedig yn cael unrhyw effaith sylweddol nac annerbyniol ar gyflawni'r amcanion lles.

8. Pa ymgynghoriadau a gynhaliwyd gydag Archwilio ac eraill?

- 8.1 Ni chynhaliwyd ymgynghoriad gydag Archwilio. Yn ôl deddfwriaeth, roedd rhaid i'r Cyngor adael i aelodau'r cyhoedd, gan gynnwys tiffeddianwyr a thrigolion lleol a effeithiwyd, gyflwyno sylwadau a gwrthwynebiadau am gyfnod o 28 diwrnod.

9. Datganiad y Prif Swyddog Cyllid

- 9.1 Ni fydd y Cyngor yn mynd i unrhyw gostau ychwanegol os bydd yn cadarnhau'r Gorchymyn Cadw Coed sy'n ymwneud â Thir gerllaw Glasfryn, Gellifor, oni chaiff y penderfyniad ei herio ar sail camgymeriadau gweithredu gan wrthwynebydd yn yr Uchel Lys. Yn yr un modd, mae rhywfaint o risg o wynebu hawliad am iawndal yn sgil gwrthod unrhyw ganiatâd angenrheidiol dan y Gorchymyn, ond caiff y perygl hwn ei liniaru os bydd y Cyngor yn rheoli'r broses yn dda.

10. Pa risgiau sydd yna ac oes yna unrhyw beth y gallwn ei wneud i'w lleihau?

- 10.1 Gallai'r Cyngor gael ei herio ar sail camgymeriadau gweithredu yn yr Uchel Lys, yn unol â darpariaeth deddfwriaethol.
- 10.2 Yn yr un modd ag unrhyw Orchymyn Cadw Coed arall, mae yna rywfaint o risg o wynebu hawliad am iawndal yn sgil gwrthod unrhyw ganiatâd angenrheidiol dan y Gorchymyn (gweler Gorchymyn Enghreifftiol GCC Erthygl 9).
- 10.3 Os na fydd yr Aelodau'n gwneud penderfyniad am GCC dros dro CSDd rhif 01/2017, bydd yn colli ei rym ar 24 Medi 2017. Bydd hyn yn golygu na fydd y goeden wedi'i hamddiffyn o gwbl.

11. Grym i wneud y Penderfyniad

- Deddf Cynllunio Gwlad a Thref 1990;
- Rheoliadau Cynllunio Gwlad A Thref (Coed) 1999